

太平經卷之六十六

三五優劣訣第一百

大暗愚日有不解冥冥之生稽首再拜問一
 大疑何等也書中此比道天上皇氣且下今
 說不知其為上皇氣云何哉子延知深疑此
 可謂已得道意矣行明聽為真人具陳之天
 有三皇地有三皇人有三皇天有五帝地有
 五帝人有五帝天有三王地有三王人有三
 王天有五霸地有五霸人有五霸何謂也天
 有三皇若三光地有三皇若高下平人有三
 皇若君臣民也天有五帝若五星地有五帝
 若五嶽人有五帝若五行五藏也天有三王
 若三光地有三王若高下平人有三王若君
 臣民天有五霸若五星地有五霸若五嶽人
 有五霸若五行五藏也天師奮哀憐愚生加
 不得已示以天法願聞其優劣云何哉善哉
 子之難問可謂得天意適人天心可萬萬世
 貫結者不復去也然天之三皇其優者若日
 其中者若月其下者若星也其優劣相懸如
 此矣地之三皇其優者若五嶽其中者若平

土其下劣者若下田也其優劣相懸如此矣
 人之三皇其優者若君其中者若臣其下者
 若民其優劣相懸如此矣天之五帝其優者
 比若四分日有其三也其中者比若四分月
 有其三也其下者比若四分星有其三也地
 之五帝其優者比若四分五嶽有其三也其
 中者比若四分平土有其三也其劣下者比
 若四分下田有其三也人之五帝其優者比
 若四分大國有其三也其中者比若四分大
 臣有其三也其劣下者比若四分民有其三
 也天之三王其優者比若四分日有其二也
 其中者比若四分月有其二也其劣下者比
 若四分大星有其二也地之三王其優者比
 若四分五嶽有其二也其中者比若四分平
 土有其二也其劣下者比若四分下田有其
 二也人之三王其優者比若四分大國有其
 二也其中者比若四分大臣有其二也其劣
 下者比若四分民有其二也天之五霸其優
 者比若四分日有其一也其中者比若四分
 月有其一也其下者比若四分大星有其一

也地之五霸其優者比若四分五嶽有其一
 也其中者比若四分平土有其一也其下者
 比若四分下田有其一也人之五霸其優者
 比若四分大國有其一也其中者比若四分
 大臣有其一也其下者比若四分民有其一
 也此延天道不遠三五各自反也故天有三
 皇五帝三王五霸地亦自有三皇五帝三王
 五霸人亦自有三皇五帝三王五霸也其何
 一多也願天師分解其訣意然夫天地人本
 同一元氣分為三體各有自祖始故三皇者
 其祖頭也五帝者其中興之君也三王者其
 平平之君也五霸者是其末窮劣衰與刑危
 亂之氣也故到五霸延四分有其一者天道
 其統幾絕也過此下者微末不能復相拘制
 比若大弱不能制強柔不能制剛少不能制
 衆道且大亂不能復相理故更以上復起何
 謂也然九皇者皆始萌於北五帝者始生於
 東三王者茂盛於南五霸者殺成於西也天
 生凡物者陽氣因元氣從太陰合萌生當
 出達故茂生於東既生當茂盛故盛於南既

茂盛當成實故殺成於西天地陰陽道都周夫物不可成實死而已根種實當復更生故今陰陽俱並入天門合氣於乾更以上始此天地自然之性也善哉善哉夫天地人何不共三皇五帝三王五霸乎善哉子之難得其意夫天地人分部為三家各異處夫皇道者比若家人有父也帝道比若家人有母也王道比若家人有子也霸道者比若家人有婦也今三家各異處豈可共父母子婦耶是若人分為三家寧得共父母子婦乎真人寧曉不唯唯慎之亦無妄枉難也天道自有格常法不可但以強抵觸之也不敢不行努力唯唯雖每問事犯天師諱不問又無緣得知之欲復乞一言平行今是有四十八部四十八部其行云何哉善乎詳哉子之問事也此行得天心意者災變不得起也失天要道者災變不絕故使前後萬萬世更相承負夫善為君者廼能使災谷自伏消其所失至要自養之道者反使邪氣流行周遍天下故生是餘災反為承負之厄會何謂也然精聽吾言唯

唯天之上君若日中者若月下者若星也地之上君若五嶽中者若平土下者若下田也人之上君若君中者若臣下者若民也有其全者其人民萬物悉無病平安無為盜賊欺偽佞者也天地無災變所謂上優有其全者也其四分有其三者其三分人平善忠信其一分傷死或為盜賊共為邪惡變怪多少隨此四分一其四分有其二者其半人民萬物有病為不信半人有欺偽之心其天怪變半其四分有其一者其三分者悉病無實欺為佞皆為盜賊無有相利之心一分者為善耳天怪前後不絕不處甲處乙會不去其部界中也何故乎善哉子之言也是今盡有者其道德悉及之德所及者能制之故盡善萬物都蒙其道德故平平也其四分有其三者其道德不及一分故一分凶也其四分有其二者其半道德不及覆蓋故半凶也其四分有其一者德微財及一分不及其三分故三凶也是故古者聖人帝王欲自知優劣以此占之萬不失一也所不及何故病乎道德不能

及無為無君長萬物無長故亂而多病茲稽盜賊不絕也古者以此占治以知德厚薄視其氣與何者相應以此深知治之得失衰盛明於日月也善哉善哉以何救其失乎善哉今真人以既知天經當止此流災承負萬物也夫災以何止之唯天師教眾賢使得及上皇氣然宜各論真道於究各思初一以自治勞病即其復優盡令有之矣善哉善哉行真人戒事唯唯謹己敬受四十八部戒矣其行道長短云何哉詳乎子問也不敢不詳天道致重師教致嚴故敢不一二問之也善哉知為弟子數可以通天道意然天道有三道應太陽太陰中和優者行外其次行中其次行內霸者無道但假路三王之內道最短天皇大優者最行外九皇共一道相次劣者在內其優者步行而不移其次微移其次微知十五帝共一中道也其優者行外其次行而知其劣者行而疾也三王九人共一內道驕行其次小疾其劣者馳也十五霸最假內極路其優者若飛行外其中者若飛而疾其劣者

1776 (048) 4

若失也真人知之乎善哉善哉真人前子問此事何一詳也哉然吾初生以來怪歲一長一短日一厚日一薄一前一却不及天師問恐遂不知之願聞其意善哉子之言也然厚者天之日也其次厚者地之日也其次厚者人之日也其最薄者萬物之日也真人知之耶唯唯行去勿復竟問是者子之私也非難為子窮說之也天下會無以為亦無益於帝王承負厄會百姓之愁苦故不為子分別道耳不惜之也唯唯多犯天師諱有大過不謙也樂欲知天上之事者有私乃來為子悉說之唯唯行去

右分別九皇十五帝九玉十五霸行度優劣法

太平經卷之六十六

太平經卷之六十七

六罪十治訣第一百三

傳四

真人前凡平平人有幾罪乎平平人不犯事何罪過哉意真人何其瞑冥也愚生不開達初生未常聞人不犯非法而有罪也子言是也與俗同記不睹凡人迺有大罪六不可除也或身即坐或流後生真人學迺不見此明白罪學獨不病憤憤耶愚生忽然不病之子尚忽然夫俗人懷冤結而死是也誠窮乎遂無知然而死訖覺悟天地間隔以來凡人先矇後開何嘗理乎願聞之然人積道無極不肯教人開矇求生罪不除也或身即坐或流後生所以然者斷天道與天為怨人積德無極不肯力教人守德養性為謹其罪不除也或身即坐或流後生所以然者迺斷地養德與地為怨大谷人也或積財億萬不肯救窮周急使人飢寒而死罪不除也或身即坐或流後生所以然者乃此中和之財物也天地所以行仁也以相推通周足令人不窮今反聚而斷絕之使不得徧也與天地和氣

為仇或身即坐或流後生會不得久聚也當相推移天生人使有所知好善而惡惡也幸有知知天有道而反賤道而不肯力學之自輕不學視死忽然臨死迺自寬罪不除也或身即坐或流後生今使生遂無知與天為怨所以然者迺天自力行道故常吉失道則凶死雖愛人欲樂善著道於人身不肯力為道名為無道之人天無緣使得有道而壽也迺使天道斷絕故與天為怨也人生知為德善而不肯力學為德反賤德惡養自輕為非罪不除也或身即坐或流後生所以然者與地相反地者好德而養此人忽事不樂好德自愛先人體與地為怨也天生人幸使其人人自有筋力可以自衣食者而不肯力為之反致飢寒負其先人之體而輕休其力不為力可得衣食反常自言愁苦飢寒但常仰多財家須而後生罪不除也或身即坐或流後生所以然者天地乃生凡財物可以養人者各當隨力聚之取足而不窮及休力而不